

廬陵縣志卷三十一

人物志

儒林

南唐

羅韜字洞晦一字晦夫廬陵人唐末清修苦學淡於聲利隱居不仕南唐徵授長沙通判有惠政賜敕褒嘉病免歸益勵於學久之除端明殿學士不拜獻丹展四箴曰納誨曰防幾曰賞廉曰草蠹上悅賜金幣以歸乃去中團愛匡山山水徙居之授徒講學四方來從者至無所容建書院於山麓設孔聖殿五經閣置田贍學以便學者事聞賜額匡山書院敕曰朕惟三代盛時教化每由於學校六經散後

廬陵縣志

卷三十一

儒林

斯文尤託於士儒故凡閭巷之書聲實振國家之治體前
端明殿學士羅韜積學淵源莅官清謹納誨防幾之鑑允
協朕心賞廉草蠹之箴顧存宸席尋因養病遂爾還鄉後
學雲從館起匡山之下民風日善俗成東魯之區朕旣喜
聞可無嘉勵茲敕翰林學士趙鳳大書匡山書院四字爲
之匾題俾從遊之士樂有瞻依而風教之裨未必無小補
焉時長興三年八月也及卒門人私謚靜逸先生稽是時
學校之政未有修明士溺於詞章取其應制韜崛起以聖
學爲己任興起斯文垂老不倦雖著述無傳味其制詞實
修實詣此可概見有宋道學之盛蓋與有開先之力云

遺響

舊按通志云羅韜各志俱不載白志採張簣山庸書所載羅洞晦先生傳補入顧通志過於節刪府志因之今照原文全錄又按五代明宗紀以馮道趙鳳爲端明殿學士端明殿明宗始置長興又明宗改元之號則韜應爲後唐人傳內南唐字當是後字之誤然傳云徵爲長沙通判長沙前屬荆湖後併南唐則地又非後唐所轄長沙字亦不無訛而西昌志乃謂江西時屬楊吳韜生長吳地唐豈能越江而徵遂併疑無其人不知楚材晉用原無畛域且五代干戈擾攘正史訛缺無從參考不獨韜一人爲然也誠有可疑如邑諸先輩曾養泉劉斗墟張簣山何以歷有表章况匡山書院遺址至今尙存

廬陵縣志

卷三十一

儒林

二

而目爲烏有子虛豈篤論哉附識於此以正其誤

宋

葛敏修字聖功元祐三年試禮部蘇頌濱知貢舉敏修論周秦強弱不變之弊蘇奇其文擢置名高等黃庭堅合泰和與敏修結交及是見其名大喜頌濱之得人也敏修爲人孝友伯兄敏求早世撫其孤甚恩仲兄敏明大觀初以恩科調官道死音聞敏修號痛發疾而卒官止奉議郎有道岷集三十卷胡忠簡爲之序初敏修宰確山以元符上書置黨籍崇寧二年始出籍時論高之周益國公書其後畧曰予嘗觀書太史氏按崇寧元年乙未詔書定元符末邪黨等五百四十一人而敏修姓名在焉由此罷確山令廢

於家越三年六月始出黨人謂敏修困久當少折其詩乃云從今甞勉爲忠義一噓如何便廢餐味此詩夫豈利祿得二其心哉

按吉州人文紀畧原跋謂周益公葛聖功文集序云元祐三年東坡知貢舉奉議郎葛公奏名第七據此則敏修乃東坡門下士非穎濱也

王庭老紹聖鄉舉官嶺南徽宗開辟雍制先聖冕服博議無準廷臣具薦庭老於是自賓州驛召爲禮制局檢校

人物志

劉清之字子澄廬陵人受業於兄靖之甘貧力學博極羣書紹興中成進士再調建德主簿使民自實其戶而賦役平爭訟息高安縣大被清之以縣丞奉檄視旱徒步阡陌親

廬陵縣志

卷三十一

儒林

三

與民接所蠲除具得其實州議減常平米值清之曰此惠不過三十里以內耳外鄉之民勢難遠來受米老幼必有餒死者今大戶閉糴意欲窺利我若有政則大戶得錢細民得米兩適其便乃請均境內之地爲八俾有粟者分賑其鄉官爲主之規畫防閑民甚利賴發運使史正志按部至境將拘畸零之賦清之不可正志心敬之欲薦諸朝清之貽以書曰畸零之賦皆州縣侵削於民法所當禁所謂羨餘也始者獻之自下而詔止之今則求之乃自上焉不奪不廢弊有不可勝言者願侍郎善籌經費以佐國家則士孰不願出侍郎之門不然清之不敢以玷知人之鑑尋擢宜黃令龔茂良周必大薦之孝宗召對首論民困兵驕

大臣退托小臣苟媮願陛下廣覽兼聽并謀合智提要挈綱而力行之古今未有俗不可變弊不可革者變而通之亦在陛下方寸之間耳改太常主簿丁內艱闕除通判鄂州鄂大軍所駐軍籍多偽清之使各自實而正之其俗計利而尙鬼家貧子壯則出贅尤謹奉大洪山之祠病者不藥而聽於巫死則不葬而畀諸火清之皆諭止之差權發遣常州改衡州至則戒諸邑董常賦緩雜征閣舊逋戒預折新簿籍謹推收督勾銷明逋負防帶鈔治頑梗梟吏姦擾戶長費用有節滲漏有防稽考有政補置有漸先是郡飾厨傳以事常平刑獄二使月一會集互致折餽清之歎曰此何時也與其取諸民孰若裁諸公吾所以事上官惟

究心所職無負吾民足矣豈以酒食貨財爲勤哉身自常祿外悉歸之公帑以佐經用至之日兵無糧官無奉已而郡計漸裕民力稍紓嘗作論民書一編首言畏天積善勤力務本農工商賈莫不有勸勉以事親睦族教子祀先謹身節用利物濟人婚媾以時喪葬以禮詞義質而簡而易從邦人家有其書非理之訟日爲衰息又以士風未振每因月朔具酒肴與諸生輪情論學設疑問以觀所向然後從容示以先後本末之序學者日眾則增築院齋務舍以居之所講先正經次訓詁音釋次疏先儒議論次述今所紬繹之說然後各指其宜用確然有可舉而措之之實部使者惡其不能媚已囑所厚臺臣論罷之光宗立起知袁

州而清之疾作猶貽書執政論國事諸生往問疾不廢講
論語及時艱孜孜歎息若任其責者取高氏送終禮以授
三子曰自斂至葬視此周必大來視疾謂日子澄其恣慮
清之氣息已微答云無慮可澄遂卒初清之既舉進士欲
應博學宏詞科及見朱子盡取所習焚之慨然志於義理
之學呂祖謙張栻皆神交心契汪應辰李燾亦敬慕之母
不逮養每展閱手澤涕泗交頤厚於族眾嘗序范仲淹義
莊規矩勸大族隨力行之高安李好古與族人爭財於豫
章見清之清之爲說訟家人二卦好古惕然遽舍所訟市
程氏易以歸卒爲善士所著有會子內外雜篇訓蒙新書
外書戒子通錄墨莊總錄祭儀時令書續說苑文集農書

廬陵縣志

卷三十一

儒林

五

宋史

論曰清之之政委折周詳牧民者做條理而施之何憂不
治然非心乎國心乎民誠意有所不至則徒法未有能自
行者也且其所與諸生講論非嘗切磋於師友閒確有心
得安能如此學優而仕聖有明訓有心於輔世理民者惡
可以無素業耶

朱文端名儒傳

按劉清之安志原載廬陵人謝志載清江人攷名臣言
行錄宏簡錄俱云臨江人徙廬陵

廬府志注廬陵第四塘人

今訂正

劉黼字季章許子春字景陽俱廬陵人從朱子學皆爲醇儒
朱子嘗與其親戚卑行簡云景陽已赴省季章在家凡百
必能爲汝盡心苦口須承稟不可違大學說不曉處可問

季章也黼後為特奏名第一人

鶴林玉露

胡箕字斗南銓從子通經史而贍於文尤精春秋學紹興十三年中選入國學聲譽日聞以詞賦第一授廸功郎監南嶽廟官至修職郎事親孝父歿免喪殯衰冠於墓次遇忌日歲節上冢痛哭居大學時每徒步歸省母平生廉介服用簡質與人交謙恭信誠居無惰容戲言鄉里有不善惟恐其知銓治家以嚴見憚羣從中獨於箕有加意所著三傳會例并遺稿三十卷

舊志

羅清憲字榮道廬陵儒行鄉人自幼而穎敏讀書一目數行下年甫弱冠登寧宗丙辰進士歷官嶺海左遷判江都常作詩以自娛歲大旱為民步禱甘雨如注仍疏乞減今年

廬陵縣志

卷三十一

儒林

六

田租之半上如其議會元兵窺江左諸路坐困詔清憲經營戎務尋以年老乞休歸常坐小齋與學者講明格物致知之學修身齊家之事遠近從遊者眾門人私推為樸園先生事父母以孝聞居喪廬墓卒年七十三

同

歐陽守道字公權一字廷文吉州人初名巽自以更名應舉非是當祭必稱巽少孤貧無師自力於學里人聘為子弟師主人瞰其每食舍肉食歸遺母為器馳送乃肯肉食年未三十翕然以德行為鄉郡儒宗淳祐元年舉進士廷對言國事成敗在宰相人才消長在臺諫昔在當國惡箴規言者疑讎忤及其去位共謂非才或有迎合時宰自效殷勤亦有疾惡乖方苟求疵類以致忠邪不辨黜陟無

章唱名徐儼夫爲第一儼夫曰吾愧出君上矣授雲都主簿母服除調贛州司戶江萬里守吉州作白鷺洲書院首致守道爲諸生講說湖南轉運副使吳子良聘守道爲嶽麓書院副山長守道初升講發明孟氏正人心承三聖之說學者悅服宗又新寓長沙聞守道至訪之晤語相契卽請於子良禮又新爲書院講書又新講禮記天降時雨章守道起曰長沙自有仲齊吾何爲至此仲齊又新字也踰年又新卒守道哭之慟銘其墓又薦其子必泰於當道子良代守道還吉州里有張基喪其父小祥而舅氏訟以事繫獄使不得祭邀其售已地以葬守道聞之告邑令曰此非人心濱祭而縛之撓葬而奪之舅如此是自食其肉也

廬陵縣志

卷三十一

儒林

七

請任斯子出祭而復獄令亟出之其舅醜誣守道守道亦不自辨萬里入爲國子祭酒薦爲史館檢閱召試館職授秘書省正字安南國王陳日照傳位其子求封太上國王下省官議守道謂太上者漢高帝以尊其父累朝未之有改賜稱非便南越尉佗嘗自稱蠻夷大長老正南夷事也易太以老無損或去上存其太字太宰少宰太所以別於少也謂父爲太則子爲少矣時病足不及與議遷校書郎改景憲府教授遷秘書郎轉對言欲家給人足必使中外臣庶無復前日言利之風而後可風化惟反諸身化之以儉而彼不爲儉吾惟有卑宮室菲飲食化之以廉而彼不興廉吾惟有不貴難得之貨不厚無益之藏以言罷徒步

出錢塘門惟書兩篋而已理宗遺詔聞守道與其徒相嚮
哭踊僮奴孺子各為悲哀咸淳三年特旨與祠詔大臣舉
賢才少傅呂文德舉九十六人守道與焉添差通判建昌
軍以書謝廟堂曰史贊大將軍不薦士今大將軍薦士矣
而某何以得此於大將軍哉幸嘗蒙召擢備數三館異時
或者謂其放廢無聊託身諸貴人虧傷國體則豈得而解
願仍賦祠祿足矣遷著作佐郎兼崇政殿說書兼權都官
郎中經筵所進皆切於當世務上為動色遷著作郎卒家
無一錢守道之兄妻早喪其子演五歲餘且多病浚生甫
數月守道三十未有室顧無能乳哺者日夜抱二子泣里
巷憐之吉有賢守而大家怨之厚誣以賊下其事常平使

廬陵縣志

卷三十一

儒林

八

者會早甚禱雲騰守道曰無以禱也雲騰之神唐郡守吳
侯也寃莫甚於前守匹婦藏寃旱或三年寃在民牧害豈
其小反覆千餘言或迂笑之守道告來者不倦守卒以得
直所著有易故文集宋史

舊按通志云吉州人文紀謂文宋瑞鄧中義劉會孟皆
出其門文山嘗言先生之學如布帛菽粟求有益於世
用而不為高談虛語以自標置蓋實錄云

羅泌字長源其先自熌下徙居新安之花樹下歷十世生彥
通通生泌泌四世孫福可復徙今田南則泌世為淳化鄉
人生而穎邁弱冠好讀書絕意仕宦有勸之者輒拍案而
起曰人各有千古獨進賢冠哉為詩又精深刻苦不肯隻

字同人咳唾一時高才不偶者輒藉長源解免曰才如夫
人豈屑屑以科名重耶舉丞務郎不起杜門著述家蓄書
數千卷無不研究儲高積深著路史一百餘卷凡深元隱
僻猥瑣贅餘之事皆經緯而以之用以廣人咨諏通人
問難至遊炎陵山徬徨重阜寓襄陽十有一載淳熙乙未
自題炎陵一書可考也然當時人士未有過而問者惟費
輝自衡湘抵吉接泌於闔閭泌正囊路史相隨費公見
輒拍掌曰信天下之奇作也立蕭曹功勳易作羅氏路史
難功固不在禹下生平不信浮屠嘗引种明逸自况以為
种放與我皆不喜佛但种放善飲我善隱所不同者此耳
蓋种放初有志肥遯後竟應朝廷之辟故泌言之子萃為

廬陵縣志

卷三十一

儒林

九

路史註舊志

郭適字圖南廬陵人少力學躬行嘗補獲麟後六十年闕史
刪定禮書注疏集程氏胡氏傳為春秋五傳會江西覈田
議增賦適上書郡守馮翼極言增賦不便且激民生變守
為上書得免贛寇動連兵三省其料敵多中適平日寡過
中夜坐思所行必愜於理與客語移日皆格言可範世府志
王幼孫字季稚棟頭人性篤孝母劉氏苦痰疾醫莫之治一
日夢南陽活人書或投甘桔湯良覺如夢立愈寶祐丙辰
赴闕上書言國事不報歸教授於鄉宋亡其友文天祥兵
敗執以歸過廬陵謁於驛舍為文祭之期以必死辭氣慷
慨左右嗚咽莫能仰視自是日與賓客過從守經執禮以

終年七十有六所著有中庸大學章句二卷大極圖說擬
答朱陸辨深衣圖辨經籍論易通貫三為一圖家傳譜系
簡便經驗二方各一卷雜著若干卷通志

羅士友字兼善一字晉卿號融齋新安人未弱冠喪父即取
先逋券焚之曰迫人非仁也人有急亟賤之有負之者毋
少動於色久之其人且死而士友益恩恤其妻子士友為
人謹約一衣至數年不澣旦起盥櫛畢危坐堂中終日不
惰倚雖盛寒暑以為常左右置司馬公家訓一通里之言
家法者皆推重羅氏景定元年以明堂恩授承務郎致仕
卒年六十八著有史編十卷諸家詩體若干卷子畊開慶
進士別有傳通志訂舊志

廬陵縣志

卷三十一

儒林

十

元

歐陽元字原功其先家廬陵後遷潭州之瀏陽幼岐嶷母李
氏親授孝經論語小學諸書八歲能成誦始從鄉先生張
貫之學即知屬文生十歲有黃冠者見之曰是兒神氣凝
遠目光射人當以文章冠世部使者行縣以諸生見命賦
梅花詩立成十首晚歸增至百首見者異之稍長益從宋
遺老習為詞章經史百家靡不研究伊洛諸儒源委尤為
淹貫成仁宗延祐首科進士授平江州同調蕪湖尹數決
疑獄教化大行飛蝗不入其境尋調武岡尹縣當蠻獠雜
居甫至赤水太清兩洞聚眾相攻元單騎馳諭眾棄兵伏
羅拜曰我曹非不畏法蓋常訴事於縣縣官不為直致發

憤爭殺耳因喻以禍福歸理其訟獠人遂安入爲國子博士累遷翰林待制兼國史院編修官文宗天厯初軍興旁午元日直內廷凡遠近調發制詔書檄以至郊廟建后立儲肆赦之文皆出其手初置奎章閣學士院又置藝文監隸焉文宗親署爲藝文少監纂修經世大典元言孔思晦襲封衍聖公爵最五等秩登三品而用四品銅章不稱帝是其言改鑄從三品印給之順帝元統初厯僉太常禮儀院事拜翰林直學士編纂四朝實錄俄兼國子祭酒至元五年以翰林學士告歸詔修宋遼金三史起爲總裁官發凡舉例俾論撰者有所據依史官中有露才負氣持議不公者元不以口舌爭俟其呈稿援筆竄定往往媿服至論

廬陵縣志

卷三十一

儒林

十一

贊表奏皆親自屬筆超拜翰林學士承旨以足疾屢求退不允除福建廉訪使中途乞休作南山隱居有終焉之志復拜承旨力辭不獲奉勅定國律尋乞休陳情懇切特授湖廣右丞致仕將行復降旨不允汝穎盜起蔓延南北元獻招捕策千餘言當事不能用久之得致仕以中原道梗欲由蜀還鄉帝復不允時將大赦召元草詔久病不能行命肩輿至延春閣實異數云卒年八十五追封楚國公諡曰文元厯官四十餘年三任成均兩官祭酒六入翰林三拜承旨兩知貢舉預修實錄大典三史金縉上尊之賜幾無虛歲海內名山大川釋老之官王公貴人墓隧之石藉其片言爭爲瑤重月圭齋集據宏簡錄補

册曰古大手筆聿稱燕許圭齋視草允堪鼎峙片言之出
奉如至寶實以敷華文爲載道

周鼎字仲恆大庾人其先自安成徙廬陵至鼎益自奮勵以
場屋之業不足爲去從湜溪郭氏游湜溪名正表得靜春
劉氏之傳實考亭之學也因與聞伊洛微旨四方執經者
踵至年踰四十出遊江漢禮聘交贊皆辭不受時天下承
平鼎獨言大勢日趨於亂遂著濟時十二策及戰守之書
數千言其後汝穎兵動江南受禍最酷一一如其言性嗜
古文一洗宋季刻削纖弱之弊六經皆有論著未及完獨
詩書辨正若干卷藏於家詩文曰貞一藁其孟子管子商
鞅諸論爲最偉云子愷字子諒洪武初進士

宋學士錄

廬陵縣志

卷三十一

儒林

十二

明

孫鼎字宜鉉永樂十二年舉人歷松江教授正統八年楊溥
薦爲御史董南畿學政置本源錄錄諸生善行行部不合
人知單輿猝至諸生謁輒閉門試之卽日定甲乙諸生試
歸榜已揭通衢請託者無所藉手通州旱饑奏蠲糧三千
四百餘石英宗北狩鼎試罷謂諸生曰故事當簪花宴今
臣子枕戈之秋不敢陷諸君不義設茗飲步送諸門旣而
詣闕上書請隨所用效死不報未幾以親老致仕知府張
瑄疏言鼎孝追曾閔學繼程朱宜起居論思之職帝不允
天順元年卒於家

明史

劉冕字文中澧田人弱冠補郡諸生博覽羣書已棄素業服

膺王守仁致良知之學與兄輅鬻產並往餘姚受業守仁深器之易其名爲勉與同志徃復問難無虛日守仁卒冕心喪三年聶豹以舊守平陽事中誣緹騎逮繫入京罪且不測冕毅然偕行居京師三年周旋無倦士大夫爲著共難說傳誦之及事白豹擢兵部尙書招冕出仕堅辭不就冕爲學不事浮談務實踐身體力行嘗曰憂貧則爲道之心亦爲貧憂道則爲貧之心亦爲道學者以爲名言生平多所著述子孫俱能世其德云舊志

周祿字以道受學王守仁之門以貢厯青陽訓導黃岡教諭篤志精修凝神內觀家居常靜坐一室或數月不出戶庭學以見過爲宗顧諟之勤瞬息不懈其思深而造微簡言

廬陵縣志

卷三十一

儒林

十三

晦跡人莫窺其際也聶豹爲兵部尙書嘗館之京邸有邊將求謁峻拒之及別去豹給以驛文不受歸與諸同志訂西原惜陰之會風雨寒暑必赴所著有大學約言緒言二篇弟祉亦同心倡學以選貢官至肇慶通判同

彭炳文字簡之號一菴大學士徐階提學江西時炳文以諸生受知焉嘗嘆爲江浙無雙士晚以歲貢爲潯陽訓導王守仁倡良知之學江以西最盛炳文宗良知更主躬行之實其言曰學悅事也自學自悅如飽已之腹其果然也何與人事而其枋然也人亦何與已事學者之做做在好名辨仁義以爲珩飾性命而作聲羶羶然逐一聲名聲名耳何益於七尺坐弃衣珠更覓塗飽故曰鄉愿德之賊也學

以自悅此所謂獨知之慊也所著有正學編洗心亭集禮
經會要陳嘉謨曾可耕皆出其門上同

賀鈞字信夫正德丙子鄉舉性敦厚端謹居父母喪哀毀苦
塊三年家人失火亟取累世神主出他資無所問爲麗水
知縣除苛刑重德教見上官不能俯仰閣臣張孚敬赴召
馳候絡繹鈞獨不一見改應天教授與諸生講學必依於
孝弟忠信悉却贊儀有強之者則曰吾聞諸生某貧某病
某不能婚葬盍以是助給之他日諸生受助者來謝則大
喜以爲友誼當然又自捐俸以賑寒士禮部尙書霍韜聞
其賢贈以文稱其辭不飾以屏僞禮不縛以崇質俗不諧
以自立議不炫以衷孚誠求自得而無外羨云暮年與鄉

廬陵縣志

卷三十一

儒林

十四

守益羅洪先劉文敏劉邦采劉教諸公論學不倦鄉評推
爲篤行長者所著有龍岡摘藁子涇嘉靖丁未進士官至
廣西按察副使解組歸執贄劉文敏之門請事聖學垂老
益專勤能以理學承其家云上同

劉教字道夫號建川坊廓鄉藤橋人嘉靖乙酉舉於鄉爲泰
興江陰教諭分條教士有胡安定之風陞廣平合勤求民
瘼撫綏備至嘗書八字銘諸座右曰視民如子知我者天
擢刑部主事時夏桂州嚴分宜當國皆同鄉人而嚴又係
同年相好屢爲招致深自引避惟盡心漕務力爲平反有
巨璫子弟殺人同列欲爲曲宥堅持不可竟抵諸法擢梧
州守整綱飭紀吏民懷服丁繼母憂歸遂不復仕進平生

清修勵行甘貧茹淡持身如處子義利之防嚴乎一介其學無所不窺尤熟國朝典故詩文冲漠曠逸類其爲人晚年田廬蕭條有寒士所不堪者與周羅山陳蒙山諸君子訂西原惜陰之會海內名公鉅卿莫不高之所著有論孟筆義恤刑問錄咏史等書行世同上

舊按劉教績修通志及新修府志與安福劉教牽扯混淆不知科分官階事實難以竄易而安福之劉教年三十二而卒並未登仕版操筆者未盡細參幾致以誣傳疑今特爲辨耳

陳嘉謨字世顯號蒙山南村人舉嘉靖丙午鄉試明年成進

士授廬州府推官奏最擢戶科給事中歷吏兵二科彈劾

廬陵縣志

卷三十一

儒林

十五

不避權貴以直言被敕獎資充益府冊封使以不附嚴嵩出補四川按察副使轉湖廣右參政丁父憂服闋起湖廣左參政懇辭乞休得致仕歸家貧公庭不投一刺當路有司罕識其面專用力於聖賢之學結廬翠峯蓮塘閒與學者講誦不輟常師事彭炳文劉文敏發明師說而以躬行心得爲尙述彭之言曰學貴不言而躬行惡在以門戶相詡言孔孟周程之所言行孔孟周程之所行疇非學乎述劉之言曰學者當思勉爲聖賢聖賢首格物不徧物而格之求之於吾心也又嘗訓學者曰今之講學者聚徒數百說敬說靜說誠說一而不實砥之行事要如說食終不飽人又云學莫大於變化氣質而變化必本於乾道聖賢變

化其氣質之偏長學者變化其氣質之偏短一本之乾道也與王時槐同年進士又同師文敏講學深相契合凡及其門者告之曰有塘南在可往師之塘南時槐號也鰥居三十九年祇一蒼頭給樵爨年八十有三卒自書墓石曰蒙山居士息邱所著有周易就正稿二程要語朱陸摘要念初堂長春堂山斗雲居諸集上同

劉學朱字道明號述亭城北人幼孤家貧兄學周教之性穎而醇爲郡諸生卽以理學自任嘗曰性本無二學詎有歧學者執見分歧自生障惑耳嘉靖戊午領鄉薦二兄繼歿學朱上奉寡母下卹兩從子孝慈惟謹屢上春官不第就選桃源教諭歷官南京兵部車駕司郎中致仕歸一以講

廬陵縣志

卷三十一

儒林

十六

學爲事攻苦茹淡不異儒生與王時槐主講西原時槐嘗謂人曰劉君篤志於學不事言說而潛精默會究極全生全歸之理若饑嗜甘美津津乎有味也嘗竟日靜坐不謾發一言閒欲以自得微引其端槐因其夾持啟迪遂得竭力以明正學之旨者皆劉君之賜也其相引重如此學朱之論學曰性無定體聖凡何分悟無體者卽凡是聖迷無體者卽聖是凡吾輩須是明性爲超凡入聖切實事若曰尙老實恥機械等此是世諦中驚人語非聖學也修己以敬已與敬二字竊疑後人未透久矣性無定體乃真已也不求真已乃以作爲雜之於是有戒慾主一之說此是違體徇外褻天弃天其爲不敬莫大焉須是識得性無定體

不涉一毫作爲空空不染敬修如是故能人已兩忘而可以安人眾寡一體而可以安百姓卽堯舜事業亦易易耳有生以後此也未生以前亦此也爲嬰兒時此也爲未孩時亦此也此謂大哉始物統天觀此言可以知其學之大概矣易簣日門人郭育顯往出二絕示之談笑如平時端坐斂手而逝同上

郭育顯號筆鋒荷溪人幼不好弄弱冠補諸生揮毫千言立就兩中副車因嘆曰舉子家言仕宦梯航耳堯舜可爲先賢豈欺我哉遂受業於劉學朱之門授以王守仁傳習錄朝夕披閱久之忽有省嘗與王時槐陳嘉謨辯析微旨往復問難俱深契之曰益友也萬曆癸卯以貢入都廷試日

廬陵縣志

卷三十一

儒林

十七

或告之曰先謁選人邑令可得育顯正色曰此言何爲至於我哉未幾歸講學西原嘗誨門人曰一坐之傾妄念遁起無風而浪無枝而蔓所謂人心惟危也急須一覺但覺非真覺覺後還迷耳今人每認情爲性認任情爲率性狂瀾傾矣萬曆丙午季子如闇舉於鄉聞報昇歸育顯叱曰履而往輿而歸能無愧於心乎如闇跪受教人服其庭訓之嚴年八十卒以如闇贈吏科給事中學者稱筆峯先生崇祀鄉賢同上

陳鍾號金岷馬山人弱冠補邑諸生數年卽棄去舉業深研河洛之學嘗語人曰性本無二立教則殊師事王時槐時槐講學青原白鷺閒必得鍾偕始快鄒元標雅重其人起